


# Sculptura, pictura e grafica dal 20avel tschientaner

## Istorgia da l'art figurativ en il Grischun, part 4

**Art figurativ**

**dal 19avel e 20avel tschientaner**

Il 1869 ha il cusseglier dals chantuns Peter Conradin von Planta deplorà il senn mancant per l'art en il Grischun. In indizi per la mancanza da disegners e picturs artists indigens durant quel temp è il fatg che la plipart dals scolasts da disegni, engaschads fin il 1890 a la scola chantunala, derivava da la Germania. Sco il temp avant il 1800 è era quel suandant caracterisà d'ina migraziun d'artists. L'artist il pli renomà immigrà dal sid è Giovanni Segantini, quel immigrà dal nord Ernst Ludwig Kirchner. En il cas da la famiglia d'artists Giacometti sa manifestescha clermain la tensiun tranter la patria (bregagliotta) sco lieu d'uffanza e da giuventetgna ed il center cultural sco lieu da las pussaivladas professionalas: Giovanni ha passentà sia vita en la val nativa, Augusto e Bruno per gronda part a Turitg, Alberto e Diego a Paris. A partir da la fin dal 19avel tschientaner chattan ins adina dapli dunnas tranter ils artists productivs en il Grischun. Ina da las emprimas è stada la pictura Emilie Forchhammer.



Ernst Ludwig Kirchner: Tavau (1921).

**Emilie Forchhammer**

\* 11 da schaner 1850 a S. Antônia, † 13 da zercladur 1912 a Cuira, reformada, da S. Antônia. Figlia da Christian Gottlieb, plevon, provegnint da Kiel, e dad Elisabeth nata Schlegel. Nubila. Studia a la Scola d'art a Basilea tar Johann Baptist Gabriel ed Eduard Weissbrod ed a l'Académie Julian a Paris (1877–78 e 1891–92). Viadis da studi en l'Italia, la Germania e l'Olanda. Domiciliada a Tavau. Ses opus cumpiglia picturas en pastel ed ieli, surtut purtrets, per exempel «Davoser Mädchen» en ieli sin taila (ca. 1900/12). Ses frar Theophil è stà professor e cumponist, Emmanuel medi e professor da linguas dal'India e Burma.

Adolf Collenberg

**Ernst Ludwig Kirchner**

\* 6 da matg 1880 ad Aschaffenburg (Baviera), † 15 da zercladur 1938 a Frauenkirch sper Tavau (suicidi), protestant, Tudestg. Figl dad Ernst, inschigner da palpiri, e da Maria Elisa Movina nata Francke. Nubil. Kirchner ha passentà sia giuventetgna en divers lieus, tranter auter a Frankfurt am Main il 1886, a Perlen (vischnanca da Buchrain/LU) il 1887 e dal 1889 fin a l'abitur il 1901 a Chemnitz (Saxonia), nua ch'il bab aveva ina professura. Sin giavisch dals geniturs ha el cumentà il 1901 in studi d'architectura a Dresden. El ha studegià dus semesters pictura a l'Academia d'art a Minca (1903–04) ed ha terminà il 1905 ses studis a Dresden cun il diplom d'inschigner. Il 1905 ha Kirchner fundà cun Erich Heckel, Fritz Bleyl und Karl Schmidt-Rottluff l'unioni d'artists Die Brücke, a la quala ha aderì era Cuno Amiet il 1906. A partir dal 1905 è Kirchner sa deditgà intensivamain al studi dad acts feminins ed ha cumentà ad exponer a Dresden. La fin dal 1911 ha el translocà a Berlin. Il 1913 è sa schliada la grupa Die Brücke. La primavaira 1915 è Kirchner s'annunzià voluntariamain per il servetsch da guerra, ma la fin dal 1915 è el vegnì relaschà causa in exauriment corporal ed in collaps da la gnerva. Las experientschas da la guerra al han fatg crudar en ina crisa psichica ch'ha durà fin a sia mort. Suenter emprimas ospitalisaziuns en sanatoris a Königstein (Baviera) e Berlin (1916), è Kirchner sa rendì il 1917, grazia a l'intermediaziun dad Eberhard Grisebach, per l'emprima giada en cura a Tavau ed en la clinica psichiatrica da Kreuzlingen. Il 1918 ha el translocà a Tavau (segiurns da stad sin l'Alp Stafel), nua ch'el è sa domicilià definitivamain il 1923. Il 1926 è el entrà en contact cun la grupa d'artists Rot-Blau da Basilea, a la quala el n'ha dentant betg aderì. En occasiun da sia gronda exposiziun en la Kunsthalle a Berna (1933) ha el emprindì ad enconuscher Paul Klee. Il 1937 han ils nazionalsocial-

lists allontanà passa 600 ovras da Kirchner da museums tudestgs ed han exclus l'artist da l'Academia prussiana dals arts a Berlin. Sias stentas per obtegnair la nazionalitad svizra èn stadas invanas. Dapi il 1992 exista a Tavau in museum (Museum Kirchner) deditgà a sia ovra d'art.

Il meriti da Kirchner consistan en ina nova avischinaziun da l'expressiunsem en sia ovra grafica ed en ina nova concezziun da l'uman e da la cuntrada, inspirada da l'emozium. Las ovras da l'emprima perioda èn caracterisadas d'ina penellada agitata e hectica e da colurs traglischantas. Impuls per sia ovra plastica ha Kirchner obtegnì da l'art da las stirpas africanas. Als maletgs urbans dal temp da Berlin, dominads da scenas da via nocturnas, da sias fullas e da la hectica da la gronda citad, èn suandadas a partir dals onns 1920 picturas da la cuntrada alpina svizra e da ses abitants. El ha accentuà la monumentalitad da las muntognas cun colurs spiritualmain perceptiblas e cun applitgar surfatschas pli grondas. Sut il pseudonim Louis de Marsalle ha Kirchner publicgà recensius da sia atgna ovra artistica.

Annette Baumann

**Turo Pedretti**

\* 7 da december 1896 (Arturo) a Samedan, † 17 da fanadur 1964 a Cazas, catolic, da Clavenna e da Maton (dapi il 1916). Figl da Giuliano, pictur decoratur, e da Berta nata Wolf. ∞ 1923 Marguerite nata His, chantadura. Scola d'art applitgà a Turitg, alura emprendissadi da pictur decoratur (1912–16). Exposiziuns a partir dal 1917, l'onni en il qual el ha emprindì ad enconuscher Giovanni Giacometti ch'ha suandà, sco mentur, l'activitad da Pedretti cun bainvulentscha paterna. Il 1922 ha Pedretti fatg viadis da studi a Paris e Londra. Turnà en l'Engiadina il 1923, ha el vivi a Samedan, e – suenter la destrucziun da sia chasa cun atelier tras ina lavina il 1951 – a Schlarigna. Confundatur da la Societad da picturs, sculpturs ed architectes grischuns (1936). Sper la pictura a chavallut (cuntradas, natiras mortas, purtrets) ha el creà ovras monumentalas en edificis publics e privats (oravant tut a partir dals onns 1930). Pedretti è in impurtant represchentant da la pictura svizra da cuntradas da tempra fauvisistica ed expressiunistica.

Lara Calderari

**Leonhard Meisser**

\* 3 da december 1902 a Cuira, † 2 d'avust 1977 a Cuira, da Tavau e Cuira. Figl dad Emanuel Abraham, commerziant, e da Catharina nata Ragaz, da Termin. ∞ 1939 Anny nata Vonzun. Matura a Cuira 1922. Studi da botanica a l'Universitad da Turitg 1922–23. A partir da l'atun 1923 a Paris, studi da pictura. Return a Cuira 1931, ac-

tivitat sco pictur artist liber. Conservatur a la Chasa d'art dal Grischun 1939–47. Commember da la Cumissiuon federala d'art 1948–53. Influenzà dal postimpresiuonsem, ha Meisser creà picturas da cuntradas fig nianzadas en tuns fustgs. El ha era realisà singulas picturas muralas e sin vaider main influenzadas dal postimpresiuonsem. Premi grischun da cultura 1974.

Leza Dosch

**Alois Carigiet**

\* 30 d'avust 1902 a Trun, † prim d'avust 1985 a Trun, catolic, da Trun. Figl dad Alois, pur e mastral, e da Barla Antonia nata Lombriser, da Trun. Frar da Zarli. ∞ 1943 Berta Carolina nata Müller. Emprindissadi da pictur da paraids e da decoraziun en in atelier da reclama a Cuira 1923–27, pli tard graficher independent a Turitg cun incumbensas per culissas e placats. Confundatur dal Cabaret Cornichon e responsabel per il decor, ils costumes e la reclama. Il 1939 è el sa retrag a Platenga (vischnanca da Sursaissa). Carigiet è sa lachà ispirar da ses ambient rural per ils temas da ses disegns ed aquarels, sias litografias e ses maletgs en ieli. Illustraziuns per plirs cudeschs d'uffants premiads, realisads en collavuraziun cun Selina Chönz (tranter auter «Uorsin», 1945; «Flurina», 1952), picturas muralas (sala dal Cussegl grond a Cuira, Muraltengut a Turitg). Ils cumenzaments da Carigiet sco graficher

2000 ha preschentà il Museum d'art dad Aarau ina retrospectiva da Spescha ed ina exposiziun permanenta da l'artist sa chat-ta en la Cuort Ligia Grischa a Trun. Il 2007 è vegnida averta a Trun la Senda d'art cun ovras da Spescha. Divers premis, tranter auter il Premi grischun da cultura 1993 ed il Premi d'art dal chantun da Turitg 1999.

Adolf Collenberg

**Dea Murk**

\* 29 da matg 1932 a Surava, † 21 da fanadur 2003 a Curaglia, catolic, da Münstair. Figl da Felix, chau-staziun, e dad Ursina nata Dalbert, da Luven. Nev da Tista. ∞ Filomena nata Vinzens, da Trun. Scolas a Razén, gimnasi a Cuira, scola d'art a Son Gagl 1950–51. Studis d'istorgia d'art a Roma e Paris 1953–54. Graficher da reclama a Cuira e Vaduz 1960, alura agen-telier a Cuira, dasperas pictur artist a partir dal 1962, artist a temp cumplain dapi il 1970. Numerusas exposiziuns en Svizra, tranter auter en il Kunstsalon Wolfsberg a Turitg il 1955 ed il 1999. Emprima exposiziun individuala a Lai il 1973. Murk è stà in dals picturs dal Grischun ils pli reconuschids da sia generaziun. El tgrava in stil abstract ed ils spazis da ses maletgs vivan da la dialectica da direcziuns, fatschas irregularas e structures preschentadas en in equiliber labil. Premi da reconuschientscha dal chantun Grischun 1979.

Adolf Collenberg



Pictura murala dad Alois Carigiet en la sala dal Cussegl grond a Cuira.

FOTO P. DE JONG

da reclama èn preschents en si' ovra: el ha adina preferì las colurs primaras traglischantas e la linearitad. Premi grischun da cultura 1974. Undrà cun il Curtin d'onur da la Lia Grischa a Trun. Tapan Bhattacharya

**Matias Spescha**

\* 17 da fanadur 1925 a Trun, † 28 da zercladur 2008 a Turitg, catolic, da Trun. Figl da Pieder Giusep, chalger, e da Margreta Catrina nata Nay, da Breil. Frar da Hendri. Nev da Sep Mudest Nay. ∞ 1956 Amelia Anni nata Centeno, dals Stadis Unids (separaziun 1967). Scolas elementaras ed emprindissadi da cusunz a Trun, emploià en la Fabrica da ponn Trun SA fin il 1951 (chef da secziun). Alura pictur da placats a Turitg (intimà dad Alois Carigiet) e dal 1954–58 a Paris; scolaziun a l'Académie de la Grande Chaumière. Domicilià dapi il 1958 a Bages (Languedoc-Roussillon), nua ch'el ha creà las ovras ch'han collià l'artist cun l'avanguardia internaziunala e che furman, ensemen cun autras, il punct culminant da la pictura svizra da l'epoca. En ses maletgs, sias graficas da stampa e sias sculpturas tematisescha Spescha las relaziuns tranter funds e figuras sco era tranter surfatschas e spazis. Las pli novas sculpturas transfereschan questas tematicas en il format grond ed en la terza dimensiun. Spescha ha realisà dapi il 1956 dapli che quaranta exposiziuns singulas en Svizra ed en il Grischun (per exempel al Museum d'art dal Grischun a Cuira il 1993 ed il 2005, en il Museum Chasa Jaura a Valchava il 2003) ed exequì ina quarantina incumbensas publicas. L'onni

**Jacques Guidon**

\* 22 da fanadur 1931 a Zerne, reformà, da Bravuogn e Zerne. Figl da Giachen Mattias, pur, e da Staschia nata Bezzola, pura. ∞ 1966 Eva nata Rostetter, dad Avras. Seminari scolastic a Cuira (patentà il 1951), alura studi da magister secundar a l'Universitad da Turitg fin il 1954, magister a Puntraschigna, Zuoz e Zerne 1954–84. Collavuratur regiunal da la Lia Rumantscha 1984–94. Pictur e scriptur rumantsch enconuschent. Sia pictura po vegnir attribuida a l'expressiunsem abstract. Ultra da maletgs d'inspiraziun libra ha el realisà picturas da paraid, illustraziuns e caricaturas («Pennarias», 2001; «Figuras», 2004). Lovra litterara cumpiglia dramas («L'iral», 1991; «Zisca», 2001), raquints («Raquints», 1989; «Brascher», 1996), satiras e gieus festivs («La svouta», 1999; «La fuschella», 2002). Confundatur (1971) e redatur da la revista satirica «Il Chardon». Premi grischun da cultura 2006.

Leza Dosch



Maletg da Dea Murk.

FOTO T. DEFFLIA

**Lexicon Istoric Retic**

Il LIR cumpiglia bundant 3100 artigels (geografics, tematics, artigels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiuon online: [www.e-lir.ch](http://www.e-lir.ch); versiuon stampada: [www.casanova.ch](http://www.casanova.ch) u en mintga libreria.